

08 MAY 1999

## NAIB PRESIDEN IRAQ LAWAT MALAYSIA

KUALA LUMPUR, 8 Mei (Bernama) -- Naib Presiden Iraq, Taha Yassin Ramadhan akan melakukan lawatan rasmi empat hari ke Malaysia bermula esok.

Wisma Putra dalam satu kenyataan hari ini berkata, lawatan itu adalah atas jemputan Timbalan Perdana Menteri Datuk Seri Abdullah Ahmad Badawi.

Taha akan diiringi oleh Menteri Industri dan Galian, Adnan Abdul Majeed dan delegasi 10 pegawai kanan.

Antara aturcara dalam program lawatan Taha ialah kunjungan hormat terhadap Perdana Menteri Datuk Seri Dr Mahathir Mohamad.

Naib Presiden Iraq itu akan mengadakan perbincangan dengan Timbalan Perdana Menteri mengenai isu-isu dua hala dan antarabangsa yang menjadi kepentingan bersama.

Abdullah juga akan mengadakan majlis makan malam bagi Taha dan delegasinya.

Semasa berada di sini, Taha juga akan mengunjungi Speaker Dewan Rakyat Tun Mohamed Zahir Haji Ismail, melawat Unit Perancangan Ekonomi (EPU), Petronas dan ASTRO dan juga akan menemui masyarakat perniagaan Malaysia.

-- BERNAMA

ZKS PR